

RREGULLORE

MBI DETYRAT, KOMPETENCAT DHE FUNKSIONIMIN E DEGËVE TË SHOQËRIVE PUBLIKE PRANË PREFEKTURAVE

Degët e shoqërive publike pranë prefekturave, organizohen dhe funksionojnë të përfshira në strukturën dhe organikën e Ministrisë së Ekonomisë. Pagat e punonjësve të degëve do të jenë ato të parashikuara në lidhjen përkatëse të vendimit të Këshillit të Ministrave nr.726, datë 21.12.2000 për punonjësit e prefekturave dhe urdhrit të përbashkët nr.9, datë 1.10.2002 ndërmjet Ministrisë së Ekonomisë dhe Ministrisë së Punës dhe të Çështjeve Sociale "Për pagat e punonjësve të sistemit të Ministrisë së Ekonomisë".

Të drejtat dhe detyrimet e punonjësve të degëve të shoqërive publike rregullohen me ligjin nr.7961, datë 12.7.1995 "Kodin e Punës të Republikës së Shqipërisë".

Emërimi dhe shkarkimi i punonjësve bëhet nga Ministri i Ekonomisë.

Degët e shoqërive publike kanë këto funksione dhe kompetenca:

Degët e Shoqërive publike në prefektura kontrollojnë procedurat e privatizimit të pronës publike në territorin administrativ të prefekturës përkatëse, duke u bazuar në aktet ligjore dhe nënligjore në fuqi. Administrata e subjekteve publike dhe jopublike, ku shteti është pronar, ortak apo aksionar, është e detyruar t'u vënë në dispozicion degëve të shoqërive publike, dokumentacionin e privatizimit të aseteve, kontratat e qiradhënies apo enfiteozës dhe dokumente të tjera, objekt verifikimi, kontrolli e vlerësimi.

Degët e shoqërive publike, bashkërendojnë punën me administratën e organeve të qeverisjes vendore, të ndërmarrjeve shtetërore dhe shoqërive tregtare me kapital pjesërisht apo tërësisht shtetëror, për miradministrimin e pronës publike.

Kontrollojnë metodikën e ndjekur, saktësinë e veprimeve të kryera për vlerësimin e pronës publike për privatizim, si dhe përputhshmërinë me legjislacionin në fuqi dhe përcjellin dokumentacionin, sipas rastit: në organet e vartësisë administrative apo në degët e Agjencisë Kombëtare të Privatizimit pranë prefekturës.

Ndihmojnë dhe udhëzojnë administratën e ndërmarrjeve apo të shoqërive tregtare për plotësimin e dokumentacionit të vlerësimit të pronës publike në përputhje me legjislacionin në fuqi.

Degët e shoqërive publike raportojnë për zbatimin e detyrave të mësipërme sa herë që kërkohet nga drejtoritë përkatëse në Ministrinë e Ekonomisë (në Drejtorinë e Privatizimit të Ndërmarrjeve dhe Shoqërive të Vogla e të Mesme dhe Drejtorinë e Administrimit të Pronës Publike), por jo më vonë se data 10, pas mbylljes së tremujorit.

II. DETYRAT E DSHP-VE PËR QIRADHËNIEN DHE MONITORIMIN E KONTRATAVE TË QIRASË E TË ENFITEOZËS PËR PASURITË PUBLIKE

1. Ndjek monitorimin e kontratave të qirasë që janë lidhur nga subjektet publike në prefekturë.
2. Ndjek zbatimin e akteve ligjore dhe nënligjore në fuqi në hartimin e kontratave të qirasë, duke bërë kontrollin e objektit të dhënë me qira, varësinë administrative të tij, vlerësimin e qirasë për sipërfaqen e ndërtesave dhe të truallit, makineri-pajisjet etj.
3. Merr informacion çdo 3-mujor për ecurinë e kontratave nga organet që kanë dhënë objekte me qira për realizimin e kushteve të kontratës, pagesave, shlyerjeve të debive ndaj shtetit etj.
4. Jep informacion çdo 3 muaj në Ministrinë e Ekonomisë për monitorimin e kontratave të qirasë, problemet e konstatuara gjatë monitorimit duke i bërë prezent ato në organet e varësisë administrative.
5. Administrojnë një kopje të kontratave të qirave për prefekturën përkatëse.

III. PËRDORIMI I FONDEVE BUXHETORE DHE MARRËDHËNIET FINANCIARE

Për të pasur efektivitet në përdorimin e fondeve buxhetore të gjitha veprimet që kanë të bëjnë me pagesa dhe shërbime për realizimin e detyrave dhe kompetencave të DSHP-ve do të kryhen nga strukturat e miratuara të Ministrisë.

Pagat e punonjësve të DSHP-ve do të përllogariten dhe shpërndahen një herë në muaj mbi

bazë të listëprezencave të firmosura nga kryetarët e degëve dhe konfirmohen nga Drejtori i Privatizimit të Ndërmarrjeve të Vogla dhe të Mesme.

Kur punonjësi për arsye objektive nuk ka mundësi të paraqitet për të tërhequr personalisht pagën, paga do të tërhiqet nga kryetari i degës.

Për plotësimin e kërkesave për materiale dhe shërbime, (shpenzime operative) DSHP-të do të paraqesin kërkesën me shkrim në Drejtorinë e Burimeve Njerëzore dhe Shërbimeve. Ky i fundit pasi i miraton ato i paraqet tek kryetari i Entit Prokurues, për realizimin e tyre sipas procedurave përkatëse të prokurimit. Nuk lejohet të bëhen blerje apo shërbime nga punonjësit e DSHP-ve.

Për shërbimet nga të tretët për energjinë elektrike dhe telefonin fiks do të lidhen kontratat me subjektet përkatëse, të cilat duhet të miratohen nga sektori i buxhet-financës në Ministrinë e Ekonomisë. Faturat e shërbimeve dhe të shpenzimeve do të kontrollohen dhe siglohen nga sektori i buxhetit

Mbi bazën e aseteve që janë në proces privatizimi, DSHP-të duhet të paraqesin planin e shërbimeve të punonjësve, brenda rrethit apo midis rretheve, për periudhën tremujore, mbi bazë të të cilit bëhen autorizimet e firmosura nga Sekretari i Përgjithshëm.

Formulari i urdhërshërbimit do të firmoset nga nëpunësi udhëtues, dhe:

- Për kryetarët e degëve miratohet (firmoset) nga Drejtori i Privatizimit të Ndërmarrjeve të Vogla e të Mesme dhe siglohet nga Drejtori i Drejtorisë së Burimeve Njerëzore dhe Shërbimeve dhe Sekretari i Përgjithshëm.

- Për specialistët firmoset nga kryetari i degës dhe siglohet nga Drejtori i Privatizimit të Ndërmarrjeve të Vogla e të Mesme, Drejtori i Burimeve Njerëzore dhe Shërbimeve dhe Sekretari i Përgjithshëm.

Kur shërbimi është në fshatrat përreth vendbanimit përfitohet dietë vetëm për distancat e miratuara nga qarku i rrethit ku vepron DSHP-ja.

BAZA LIGJORE QË USHTROJNË DSHP

- Ligji nr.7512, datë 10.8.1991 “Për sanksionimin dhe mbrojtjen e pronës private, të nismës së lirë, të veprimtarisë private të pavarur dhe privatizimit”, i ndryshuar

- Vendimi i Këshillit të Ministrave nr.159, datë 13.3.2003 “Për kriteret e vlerësimit të pronës shtetërore, si dhe procedurat e shitjes”

- Udhëzimi nr.1, datë 9.5.2003 “Në zbatim të vendimit të Këshillit të Ministrave nr.159, datë 13.3.2003”

- Vendimi i Këshillit të Ministrave nr.195, datë 20.3.1998 “Për privatizimin e ndërmarrjeve që nuk mund të transformohen”

- Vendimi i Këshillit të Ministrave nr.197, datë 20.3.1998 “Për nxjerrjen jashtë përdorimit të objekteve që nuk ka qenë e mundur të shiten”

- Udhëzimi nr.5 datë 15.5.1998 “Në zbatim të vendimit të Këshillit të Ministrave nr.197, datë 20.3.1998”

- Vendimi i Këshillit të Ministrave nr.70, datë 11.3.1985 “Për administrimin, ruajtjen, dokumentimin dhe qarkullimin e vlerave materiale dhe monetare”, i ndryshuar

- Vendimi i Këshillit të Ministrave nr.315, datë 24.4.2003 “Për dhënien me qira të pasurive të ndërmarrjeve, shoqërive apo institucioneve shtetërore”

- Udhëzimit nr.4, datë 11.6.2003 “Për vendimin e Këshillit të Ministrave nr.315, datë 24.4.2003”

- Udhëzimit nr.5, datë 19.1.2004 “Për monitorimin e kontratave të qirasë dhe enfiteozës, vlerësimin e investimeve në objektet e dhëna me qira dhe enfiteozë, monitorimi i tyre dhe aplikimi i koeficienteve të uljes së çmimit të qirasë”

Për zbatimin e kësaj rregulloreje ngarkohen Drejtoria e Privatizimit të Ndërmarrjeve të Vogla dhe të Mesme, Drejtoria e Administrimit të Pronës Publike, Drejtoria e Burimeve Njerëzore dhe Shërbimeve dhe sektori i buxhetit.

MINISTRI I EKONOMISË
Anastas Angjeli

